

Число 2.

Ужгород, января 1922.

Рочник II.

БЛАГОВѢСТИК

ДУХОВНА ГАЗЕТА ДЛЯ ПОДКАРПАТСКИХ РУСИНОВ

Выходит раз в мѣсяць.

АДРЕС:
редакції и експедиції:
REDAKCIJA „BLAHOVISTNIK“
Užhorod, Kapitulska 11.

ПРЕДПЛАТА:

на рок	10 К
одно число	1 К
За границу ...	15 К
Америки ..	25 с ($\frac{1}{4}$ Д)

ОБЯВЛЕНИЯ

принимаются по цѣнѣ	
за 1 сторону ..	120 К
за $\frac{1}{2}$ сторону...	75 К
за $\frac{1}{4}$ сторону ..	50 К

РЕДАКТОР-ИЗДАТЕЛЬ:
АВГУСТИН ВОЛОШИН.

ОТВѢЧАТЕЛЬНЫЙ РЕДАКТОР:
ЕМИЛІАН БОНШАЙ.

Пришествіе Спасителя!

Аж читаеме Святое Письмо Ветхого Завѣта, наскоро порозумѣме, что тото е не лишь історія Юдейскаго народа, но е и окремѣшня исторія истинної вѣры, котру Бог небесный хотѣв на земли чистотно подержати. Юдейскій народ Бог не зато избрал собѣ, гибы його май любив од других народов, або гибы других народов ненавидѣв, ай зато, бо через сесь „избранный“ народ хотѣв подержати на земли межи всѣми людьми упознаня одного истинного Бога и надѣю на будущаго Спасителя.

Что е днесъ каждый Богу посвященый и окремѣшными благодатьми подареный чоловѣк, что е священник совзором вѣриков, то мав быти Израильскій (Юдейскій) народ у ветхом завѣтѣ совзором всѣх людей всего свѣта: на сесь бо народ издав Бог, як на священника днесъ издае всѣ свои обѣцянки, законы, науку, и через сесь будущое блаженство и спасеніе. Сього на-

Сторона 2.

„БЛАГОВѢСТНИК“

Рок 1922.

рода сесе бѣла задача: хоронити вѣру у одном Бозѣ и надѣю о будущем Спасителѣ.

И Израильяне, хотяй много согрѣшили против Бога и вѣры, хотяй и идолам кланялися, однако через 4000 роков посокотили истинну вѣру у одном Бозѣ, бо все были межи ними люде побожнѣ, котрѣ хоронили закон од Бога данный и у многих бѣдах, войнах и гоненіях подержали с вѣрою и туту надѣю, что Бог зажене того Спасителя, котрого так много раз через теченіе Ветхого Завѣта пообѣцяв.

А коли обѣцяв? Знаєме добрѣ, что уже первый чоловѣк запровадив грѣх, бо не подержав туту единственную заповѣдь, котру йому Бог дав у раю, бо ъв из заказанного дерева, и сим упав у грѣх, утратив и рай и невинность свою и ласку Божу и зачѣм за грѣх Бог пеклом карає, заслужив уже первый чоловѣк погибель вѣчну, то е пекло. Вшитко, что дорогое было души, утратив чоловѣк грѣхом, — и зато по правдѣ мог зажуритися и упасти в отчаяніе. Но Бог несказанно добротливий и милостивий и як го выгнав из рая, зараз и розмиловався над ним и пообѣцяв, что породится пак Тот, кто изкрошить голову изводителя діявола и род чоловѣческій освободить од погибели.

Сесе бѣло первое обѣцяння будучого Спасителя.

Часом розмножилися люде, но розмножилися и грѣхи и журы и отчаяніе, но Бог милостивий опять поновив обѣцяння свое и все май ясно изявив о будущем Откупителѣ так, что аж читаєме Святое Письмо Ветхого Завѣта — а май

Пророки — и всѣ мѣста, котрѣ за Мессію (за Спасителя) говорять изберемe: чисто и ясно найдемe, кто Он мае быти, од кого и де ся родить, як буде жити, учити, чуда чинити, пророковати, продатися, розпятыи на Крестѣ умерти и потому славно воскреснути. Одним словом книги Ветхаго Завѣта так пишуть за будущого, як бы уже у минулом видѣли.

Протекло 4000 роков и пришов тот тяжко чеканий час, коли Спаситель явитися мав. И сесе уже дуже треба было не лишь Израильскому народу, ай и всѣм людьом, бо цѣлый свѣт чув, розумѣв страшный терх, тяжкое беремено грѣха и нївѣжества, и всѣм якось совѣсть казала, что сесе уже довго сяк не може быти, уже дуже бы час, обы ктось из неба, або сам Бог деяк помог чоловѣку у сем блудѣ, обы явився и помог и изявив, як бы мож освободитися из сеї душевної бѣды? Не лишь Израильскій народ и його пророки чули и говорили сесе, ай и поганскѣ учень, просвѣщенѣ люде, бо и они знали, что тяжкое беремено грѣха хоть кто не годен из людей изняти.

Наконец и прійшов тот час, коли явився Спаситель и знаемe добрѣ, что есть Іисус Христос, Сын Божій, друга особа Тройцы Святої у тѣлѣ чоловѣческом, котрого приход ид нам и у нашем обрадѣ май большій знак Божого милосердя ид нам, у нем возстае сонце правды, котрое „просвѣщає кожного чоловѣка грядущаго в мѣр.“

О як счастливый из нас каждый, котрый ид тому спасительному рождеству приго-

Сторона 4.

„БЛАГОВѢСТНИК“

Рок 1922.

товився, приладив свою душу, свою совѣсть, обы у ней радостно найшов Іисус Христос собѣ достойное, чистенькое мѣсто, чтобы прійшов родитися нам, на наше спасеніе и на наше откупленіе от погибели вѣчної.

Душа наша жадна была Его прияти, о кобы жадна Его и подержати у собѣ и нигда грѣхами не выгнала Его из себе!

Мирон Андрей Шерегій.

Бесѣда.

Смутное роздво.

Было се на самый святый вечер. Уже смеркало ся. На дозѣ ишли троє: Молода жона с двома дѣтьми. На лицѣ жони отбивалася жура, страх и нужда. На собѣ мала легку, подерту хустку, через котру немилосердно завѣвав студений вѣтер. Оба хлопчики мали також дуже нужденну одѣж.

Сесѣ троє бѣднѣ люди были: Миколова и еї дѣти: Юрко и Петро.

Миколовой николи и на гадку не пришло, что в свѣтѣ може змѣститися только горя и нужды. Перед 9 роками старався онѣ убо гий, але чесный еї муж, роботник. Он заробляв при сти-наню дерева в лѣсѣ и сеся робота приносила им только доходку, что можно было и дачто заощадити на будучность. Их щастя еще збольшилося коли Бог обдаровав их двома дѣточками, ягодками румяненькими и здоровенькими.

Но одного дня все змѣнилося. Его привалив зрубаний дуб и забив на мѣстѣ, а она из жалю и туги попала в страшну хвороту, заощаданѣ грошъ пошли на лѣкаря и лѣки, так что не

Рок 1922.

„БЛАГОВѢСТИК“

Сторона 5.

било из чого выплатити квартиру, а немилосердный хижный пан выкинув ѿ разом с дѣтьми на улицу на самый святый вечер.

С горким сердцем пустилася она теперь до сусѣдного села, може дакто найдеся и розмилосердиться над нею. Уже не далеко были от села, коли на хвору жену падав такій кашель, что аж дуситься. Мусѣла сѣсти у снѣг. Из села долѣтав радосний звук дзвонов, что широко розходився по полю.

— В селѣ дзвонять на вечер — простогнала бѣдна жона — але я дальше не пойду, бом не годна. Мусиме туй заночувати.

Не далеко била копица сѣна, до половины уже розобрана.

— Лѣзте мої дѣточки на сѣно, я вас подсаджу. И она подсадила вперед меньшого, а старшій сам выдрашився. За ними полѣзла и мати.

Молодшій зараз уснув из утомы. Жона не могла спати. Еї проймав якійсь страшений холод и стала дрожати так сильно, что губы так ся трясли, что ледви могла промовити:

— Ой Боже мой, Боже! Ой зимно, зимно!

На конди она успокоилася. Юрко ляг собѣ коло неї, але не спав. Все дотулився головкою до мамы и шептав:

— Мамко, мамко тепер уже тепло, правда? Бо твоя головка уже дуже загрѣлася, аж пече.

Она прочуяла:

— Де я? Кто туй е? я ничего не виджу.

— Се я мамко — отповѣв хлопчик — я туй, Юрко, не знаеш? Мы есме на копилѣ. Петро спить а тут темно аж страх.

Жона лежала хвилю спокойно а потом зачала плакати:

— Ой кобы тут быв священник — слогнала але гдѣ, ты не знаеш дороги... Боже, Боже помилуй мене грѣшну.

Затихла цѣлком. Довго не отзывалася ни словом, аж за якій час промовила:

— Но дяковати Богу, я уже с Господоньком поговорила ся. Он мене помилує; Я рада умерала бы — але ты Юрку и Петре...

— Ой нѣт, мамко не умерай — скричав Юрко. Правда мамко, что ты не умреш?

— Тихо Юрко — отзвалася — уважай, добре и запамятай себѣ, что я тобѣ кажу. Правда что всегда будеш добрым и чесним?

Сторона 6.

„БЛАГОВѢСТНИК“

Рок 1922.

— Буду, буду мамко, дуже добрий и буду молитися, але не умерай.

— Юрку — простогнала мати здушуючи слезы — я тепер дуже змучена и буду довго спати... дуже довго. Завтра рано чтобысь мене збудив... не можеш мене збудити, то побїжи в село и кажи се людям. Добре Юрку?

— Но добре, добре, спи.

— И тепер збуди Петра, я мушу вас поблагословити.

Але Петра тяжко было збудити; Юрко мусѣв го притягнути до матери. Она положила на них свої дрожачѣ руки и промовила:

— Най вас Господь Бог благословить, мої любѣ дѣтонки.

— Пригорнула их и горко заплакала. Потом спокойно промовила:

— Но ідѣть дѣточки спатоньки а я також.

Дѣти знов позахвалися в сѣно и скоро заснули. Тым часом хвора щиренько стала молитися и за якій час заснула також, — чтобы уже не збудитися на сем свѣтѣ.

Настав день. Юрко як збудився, зараз глянув на маму Мамо, мамо! Вставайте, уже день! Мати не порушилася.

Юрко тепер почав еї мати за руку и еще голосившѣ кричати до еї уха:

— Мамо ставайте. Отвориѣть мало очи! Але се не помогло; еї руки и лице били студенѣ як лед.

Тепер зачала бѣдна дѣтина горко плакати, вконци збудила Петра.

— Петрику встань, мусиме ити в село, чтобы люди пришли збудити мамку. Она уже так довго спить, а я не годен еї збудити.

Он вытягнув Петра из сѣна и взяв его на плечѣ. Пошли, побѣгли. Юрко аж упрѣв под тяжким тягаром и за якій час стали в селѣ перед першою хижою. Туй бывали богатый господар Стефан и его богохвальна жонка: Олена. Як дѣти зайшли до хижы, Олена аж плеснула из дива в долонѣ.

А де вы зайшли дѣточки? Что вам ся стало?

— Мы идеме из сусѣднього села — казав горко — недобрый господарь выгнав нас вчера из хаты; Мама была дуже слаба, не могла дальше ити, ляглисме в одну копицу; она там спить а я не мог еї збудити... она дуже змерзла.

Рок 1922.

„БЛАГОВѢСТНИК“

Сторона 7.

Олена обтерала слези и казала :

— О бѣднѣ сиротки, лѣзте на пец, та загрѣйтесь, дораз достанете дачто Ѵсти,... Люди дораз пойдуть подивитися что дѣлеся с мамою.

За якій час занесли неживу Миколову до Стефанової хижы.

Коли дѣти сѣ увидѣли, зачали так страшно плакати, что и камѣнь бы порушився. Юрко прибѣг до матери, обняв єї своimi рученьками, голубив, пестив, просив :

— Мамко солодка ! На что ты нас здурила ? Ты казала, что не пойдеш до Бога, бо мы еще маленькѣ, а ты пошла. Ты уже до нас николи пе прийдеш. Мамко подивися як дѣти твої плачутъ. Ой, ой, ой, мамка не хоче отзватися, ой ой.

Плач и смуток пановав в домѣ Олени через цѣлѣ свята. Коли на третій день спускали умерлу до гробу, то ледво здержали бѣднѣ дѣти чтобы не скочили за нею до гробу.

-- Мамко, мамко солодка не иди ог яс, не иди !

* * *

Сироты лишилися у Олени. Годѣ им было однак забыти матѣрь и они не раз цѣлыми годинами пересиджували на гробѣ матери и плакали.

Раз коли дѣти на дворѣ стояли, Юрко дивиться на синьое небо и саже :

Петре, позерай там горѣ, wysoko е наша мати.

— Де ? звѣдав живо Петро.

— Там горѣ, в небѣ за тими хмарками.

— Та идѣм на туту высоку гору, туй не далеко е, а зводтам можеме пойти до неба.

— Та де ? отновѣв Юрко — от горы еще до неба дуже далеко, але неудовга прийде мама и заведе нас до неба, бо менѣ днесъ снилася мама и казала, что нас незадовго возьме до неба. Неудовга начав падати снѣг.

Юрко еще раз хотѣв пойти на гроб мами. Попов. Довго он клякав, молився и плакав и так застала егоnoch. Его переняв сон. Он сѣв собѣ на гробѣ и вперся плечами на крест тай заснув.

Снѣжок прикрив Юрка своим бѣлим простирадлом а он спав солодко.

В хижѣ довго ре утямили, что Юрка нема. Коли утямили, зараз пошли его глядати. С тяжкого бѣдою найшли его на гробѣ матери — неживого.

Мати дотримала слова, пришла и взяла Юрка. Теперь лежить он нобоч своеї любої матери.

Вѣра.

Кто есть видимым управителем церкви?

Іисус Христос есть невидимым управителем. А видимым?

1. Схизматическая церковь учиь, что: каждый епископ в своей церкви есть мѣсто-блюститель Христов, головный учитель и головный управитель своеї частної церкви. „Изложение православной вѣры“ подписанное восточными патріархами 1672 года называе еписконоў правителями, начальниками и главами своих церквей. Само так говорить и „Православное исповѣданіе“ Петра Могилы.

Таким образом по ученію схизматической церкви в видимой части святой матери церкви не только одна голова есть, як мы вѣруєме, но больше як тысяч голов, котрѣ никому на земли не подчиненѣ, цѣльком самостойно и независимо управляють своими епархіями и вѣрниками. Ци не зробить сим способом схизматическое богословіе из прекрасного зданія Христовой церкви даякое чудовище тысячглавое? ! Ци не лѣпше отповѣдуе намѣренію І. Хрта основати таку церков, котрою в животѣ управляе он, по вознесенію же его стадо пасти и дозерати нередає св. Петрови и его наслѣдникам?

2. Айбо ци но правдѣ такими независимыми главами суть тоты восточнѣ епископы? Смотрѣм лиш их положеніе в единой россійской державѣ.

Кто есть (або быв) в россійской церкви тата особа, котра уполномочена выдати церковнъ законы, выименовати и увольняти епископов, и быти найвысшим судом в всѣх дѣлах церковного управлѣнія; словом кто есть (або быв) в россійской церкви головным церковным управителем?!

Таку власть в Росс. церкви никто не мав, только еден чоловѣк мірскій: царь россійскій.

Се не есть наша видумка: се так стоить в их учебных книгах. „Высшая правительственная власть в русской православной церкви принадлежить самодержавному Императору, не в смыслѣ только государственного согласія (placet), а в смыслѣ внутренне-церковной правообразующей силы. „Царь в таинствѣ царского миропомазанія получает свыше силу и премудрость для правленія и церковію и государством.“ (Н. Суворов, Учебн. церкв. правы, Москва, 1902 ст. 228 и 264).

Скажѣть добродушнѣ читателѣ, что лѣшче отповѣдае намѣренію І. Христа, чтобы его стадом управляв еден свѣтскій чоловѣк, или наслѣдник того вѣрховного учителя Петра, кому сам І. Хр. казав: Паси овцы, паси агнцы моя!?



3. Но могутъ наши противники казати: мы такъ знаемъ, что найвысша церковна верхность въ Россіи святѣйшій синодъ! Передовсѣмъ посмотрѣмъ, что то „святѣйшій“ синодъ?

Коли россійскѣ епископы звѣдалися отъ императора Петра I., кто буде выименованъ на мѣсто умершаго патріарха Адріана, (1702) гнѣвно закричавъ Петръ:

— „Я ваш патріархъ“ и ударивъ собѣ на груди.

И дѣйстно Петръ Великій дальше никого не выименовавъ на патр. престолъ, но года 1721 заосновавъ мѣсто патріархата Московскаго т. зв. „святѣйшій“ синодъ въ Петроградѣ. Тотъ синодъ есть якбы министерія религіи (вѣры) (якъ есть министерія торговли и загр. дѣлъ) головою есть отъ царя выименованный свѣтскій чоловѣкъ (обер-прокуроръ) а членами суть всѣ епископы. Се есть найвысша церковна власть въ россійской церкви.

Звѣдається: Отъ кого мае св. синодъ свою власть? А чей отъ Іисуса Христа? Противно! Въ „Духовномъ Регламентѣ“ составленномъ по царскому повелѣнію и подписанномъ епископами выразно сказано, что „св. Синодъ основанъ государемъ, отъ Государя получаетъ и свою власть“.

И кто стоить на чолѣ сего Синода? Въ указѣ Петра Вел. (1722, V. 12) читаемъ: „Въ Синодъ выбратъ изъ офицеровъ доброго чоловѣка, чтобъ имѣлъ смѣлость и могъ управлениe синодскаго дѣла знать и быть ему обер-прокуроромъ“ И такъ кто суть управителями россійской церкви! Добрѣ и смѣлѣ офицеры!

А сей синодъ одобрявъ и Еремій патріархъ

Рок 1922.

„БЛАГОВѢСТИК“

Сторона 11.

константинопольскій, згодилися на се вѣсъ епископы россійскѣ от Петра Вел. аж до нынѣ (кромѣ одного Арсенія Мацѣвича), навѣть подписали членам синода предписану присягу: Исповѣдую же с клятвою крайняго судію духовныя сея коллегіи (т. е Синода) быти самаго Всероссійскаго Монарха, государя нашего Всемилостивѣшаго“.

Дале сами Императоры россійскѣ себе называли главами Церкви; так Екатерина II отзываєся на „Главную в Церкви власть“ ей свыше данну, Павел I. прямо выповѣсть, что россійскѣ царѣ мають всегда „православну“ вѣру держати потому, что они суть Главою Церкви. (Посл. Собр. зак. XXIV. ст. 588).

Из до теперь сказанных явно, 1) что в россійской церкви не епископы т. е. не наследники апостолов управляют церковю Христовою, но един свѣтскій чоловѣк (царь), а 2) что не только каѳолическа церковь учитъ, что мае быти глава в Христовой церкви, но и россійска православна признає видиму главу церкви окрем Христа: самодержавного царя россійского.

Вы, читатель судѣть котroe главенство отповѣдае лѣчище Христови: главенство римского епископа, наследника св. Петра, або главенство мірского чоловѣка россійского царя.

Из житя святых.

Св. Макарій александрійскій.

Девятнадцятого января почитаеме память св. Макарія египтянина и св. Макарія александрійского. У пустыни жили они и такъ строго постили, ожь ачей и не находиме от них больших постников между святыми.

Макарій александрійскій быв родом из АLEXANDRIE. В молодости он быв торговщиком овец. Ходив из села на село и там куповав и продавав овцы и из сего жив. Коли 40 годов мав,

спознав вѣру Христову и дав покреститися. Як покрестився, пошов до пустыни и там быв учеником св. Антонія пещерника великого. Дале сходився в келіях из Макаріом другим и так жили за довгій час въедно и подвизалися в постах и молитвах. Макарій alexandrійскій так строго постив, же за 7 годов не ъв вареноѣ стравы. А потом за 3 годы, лиш мало хлѣба уживав каждоденно. Не раз спав стоячи. А коли сон свой цѣлком побѣдити хотѣв, та за 20 доб стояв на одном мѣстѣ. Постом строгим тѣло свое так высушив, что сим часом на бородѣ и един волос не мог выrostи.

Раз пак учув он, ож на одном мѣстѣ жіе один дуже славный постник, именем св. Пахомій, который має 1400 монахов постников. Разом рушився на велику путь, чтобы до Пахомія прйти. Як пришовъ на мѣсто, та просив и его пріяти межи монахов, но Пахомій не знов его и так не хотѣв пріяти его. Но Макарій за цѣлый тыждень стояв у воротах монастыря и тогда уже пріяли его. А коли настав пост великий, та Макарій став в один кутик себѣ и не ъв, не пив, не говорив и не лѣгав за довгій час, только в недѣлю ъв мало капустяного листя. Монахи зачудовалися дуже о сей великої святости и сам Богъ дав знати Пахомію, же что то за святый есть Макарій. Пахомій тогда ъмив его за руки, понес до своеї комнаты и там подяковавъ ему за той приклад, якій он другим монахам указав.

Макарій позднѣйше став священником и в сей службѣ премно-жество изкушеній перетерпѣв от діаволов. Явилися ему духи злѣ в всяких страшных формах и так не давали ему покой. Где ишов, они всягды за ним, як то и наш образ указуе. Разъ хотѣв діавол его нарадити, чтобы он ишовъ до Риму и там чуда робив. Так думав



Діаволы изнушають св. Макарія.

Рок 1922,

,БЛАГОВѢСТНИК“

Сторона 13.

чорт ож як гордость учинила из ангелов діаволов, так и Макарій через гордость може пропасти.

Но Макарій лягнув на порог своєї келіи и сам казав, чтобы 'го вытягнули оттам, но чорти не могли то учинити.

Коли изкушепіл діаволов перестали, набрав два м'хи п'єску и то носив на себѣ, чтобы т'ло свое умерщвляти. Дале за 6 м'сяців сидів в болотяных багнах и там комари так поїли его лице, же не мож было спознати его,

Сталося раз что один чернец дав ему в дарунок грозна. Макарій не хотів їсти и дав сосѣдному монахови, сосѣдний дав дале и на конец грозно, пришло опят до Макарія. Так воздержлив' были в тих часах монахи.

Чинив он и много чудес. Хвор' приходили до него и он не раз выгоив их. Раз една зв'рька принесла свое хворое щеня. Макарій выгоив и зв'рька тогда принесла ему в дарунок кожу овечу и святий розказав зв'рц'ю, чтобы она не чинила болше шкоды людям.

На розказ поганских управителей Макарія выгнали из Александріи и так он и пересл'дованя перетерп'в въедно из Макаріем египетским.

Макарій есть слово грецкое и значить „счастливый“. Цѣле можеме его счастливым называть, понеже животом своим заслужив себѣ счастливое м'сто: царство небесное.

Умер года 396. Живот его для нас описав и лишив ученик его Палладій.

О б р я д.

I. Як повстали обряды.

Свята вѣра католицка має два головн' обряды: обряд восточный, до котрого належиме мы Русины, и котрый, зове ся у нас обрядом руським, — и обряд западный, котрый зове ся обрядом латинским. Оба тѣ обряды мають окремъ Домы Божъ, окремых Епископов, окремое Духовенство и окремъ парохіи; по вѣра так руського як латинског

обряду есть одна, католицка, и вѣрнѣ и нашего и латинского обряду зостають в послушенствѣ святѣйшому Римскому Папѣ, котрый яко Намѣстник Христовий управляє Церковію Христа на земли.

Рожниця обрядов повстала од первых початков христіянства. Первым быв обряд восточный; ибо по гречески были писанѣ Евангелія и ишь святѣ Письма; апостолы и ученики Христа говорили переважно по грецки; там, на востоцѣ составили всѣ головнѣ Богослуженя; там повстали первѣ церкви хрисіянскѣ и первѣ монастырѣ; там наконец первѣ мученики пролили кров свою за вѣру Христову. Про то и обрядъ восточный есть найстаршій и годный найвысше почести.

От востока удав ся св. Петро до Риму, и заложив там апостольську свою и своих наслѣдников столицю. З водси ширено св. вѣру дальше на запад, переведено святое Письмо на язык латинскій; упорядковано тѣ сами Богуслуженя, якѣ были на востоцѣ на способ латинскій. Так отже повстав обряд западный, или обряд латинський.

Не повстали однак обряды тѣ з людскої волї але з Божого дозволу. Бог сам хотїв в великой своїй мудrosti, чтобы народы востока и запада кождый отмѣнно послѣ своєї натуры, одну святу вѣру вызнавали; чтобы одна правда Божа в двоякій способ была документована; чтобы скарб вѣры святої до стереженя. Апостольскому Престолови Римскому отданый, находив ся и в других руках, где по тысячах лѣт возможно буде поровнати, что одна и правдива есть вѣра св., котру Церковь католицка до вѣреня предкладає.

З того всего выходить, что котрому нибудь обрядови Церкви католицкої супротивляти ся

або тойже высмѣвати и зневажати, и намагати на его знищене, значить супротивляти ся Божой мудрости и Божой волѣ, что тяжкимъ есть грѣхом.

ІІ. як повстав обряд руській.

Обряд рускій есть обрядом восточным, есть живым переводом найстаршого грецкого обряда. Перевод сей допустив Бог тогда, коли Греки от единости церковної отлучилися; на документ, что скарбницю вѣры святої отдану до стереженя Грекам отбираэ им Бог за непослушенство головъ Церкви святої, и отдае ю до хороненя иному народови.

Перевод обряда грецкого на теперѣшній славянскій здѣлали с Божою волею св. апостолы славянскѣ Кирил и Методій; а тогдѣшній Папа, Іоанн VIII., урочисто потвердив сей перевод слѣдуючими словами:

„Слушно похваляеме славяньское письмо, „вынайденое через Кирилла, которое належито „отdae хвалу Божу; и розказуеме, чтобы „в том языцѣ всѣ Христа Господа приказы и „чины были голошенї. Бо не супротивляесь „то правой вѣрѣ и науцѣ, чтобы св. служба „Божа в словенском языцѣ была спѣвана, и „Евангелія и всѣ инѣ Богослуженя в сем языцѣ „голошенї; Сей бо, кто сотворив язык латинь- „скій и грецкій, сотворив и всякѣ иннѣ языки „на честь и хвалу свою“.

В сто двадцять пять лѣт потому, 988. року по Христѣ, приняла Русь сей св. обряд з власного выбору, и держить го до днесь, и уважає го найболяшою святостію своею.

Сторона 16.

„БЛАГОВѢСТИК“

Рок 1922.

Новости.

— В Ужгородской кафедральной церкви 1920 рока отслужили 2802 служб, а число причастников было 10.352. Сіє число в 1921 році виросло: 2825 служб и 10.950 причастников. Желательное бы было, чтобы в всіх церквах нашей епархії списалися службы и причастники, чтобы быв точный образ духовного житя нашего гр.-кає. руського народа.

— Вашингтонскій конгрес розпочався молитвою единого призначеннего священника а Гардинг закончив свою промову „Отче Наш“-ем. До конгреса римскій Отец Бенедикт XV. послав слѣдуючу телеграму: „Из слухаю отвореня конференції, котра скликана чтобы порѣшити велике международнѣ вопросы мира и разоруженя, из цѣлого сердца прошу Бога о успѣх, чтобы помочи несчастному человѣчеству“.

— Въроломники-схизматики другого дня Рождества богослуженіе держали въ помѣщениі ужгородской гимназії. Изъїхлося их там около 50. Лучанскій батюшка московским выговором отспѣвав им службу на которой содѣйствовал якийсь хор съ спѣвом совершенно чужим нашим мелодіям. Чудуемся и решительно протестуем против того что влада перепустила им гимназію, котра основана каѳолическими грошми для выховання нашей греко-каѳолической молодежи.

— Выименования. Данило Бачинскій, из Сѣльца до Дубровки парохом — Иван Меллеш, сотрудник из Вел. Березного до Михальовець помочным духовником, — Василь Кофланович, солочинскій духовник парохом. — Виктор Шелько, дух. управитель препарандії титуларным намѣстником. — Виктор Шуба, конс. совѣтником и до Рокосви парохом. — Александр Сабов, Дунков цкій духовник, парохом. — Емиліян Стрипскій, калинскій духовник, парохом. — Стефан Берец из Нижних Ремет до Вел. Копанѣ. — Вартоломей Галактович, из Вел. Копаны до Нижних Ремет. — Ириній Контратович, из Колоницы до Нижн. Гуњковець. — Иван Андрейцов, намѣстник и совѣтник консист., до Ублѣ. — Михайло Злоцкій, из Ублѣ до Дубровки (Земплинска ж.) — Иван Зейкань, намѣстник из Рокосви до Сѣльца, — Людвик Дудинскій, требушанскій духовник, парохом.